

Erich Bolinius

(Bericht über den BSV Kickers Emden

Sendung „Flutlicht“ auf Radio Ostfriesland

Donnerstag, 15.12.2011 18.00 Uhr auf 94.0 bzw. 87,7)

Moin, leev Toehörers,

dat is upstünns ja 'n Skietweer. So muss ok dat lesde Spöl van Kickers Emden tegen Osterholz-Scharmbeck utfallen. De Platz stunn unner Water. Komende Sönndag sall Kickers in Oldenbörg um Klock twee tegen de VFB spölen. Ik betwiefel, of dat Spöl dörföhrt worden kann. Siet Dagen hett de Stadt Oldenbörg all Platzen speert. Villicht weten de Moderatoren hier in 't Studio ja al mehr.

So kann ik natürelk 'n Spölbericht van de eerste Mannskupp van Kickers Emden neet geven. Man dor spölt ja noch de A-Jögdmannskupp van Kickers Emden. Un de sünd würrelk goed drup. Wenn man dat man van de hele Vereen ok seggen kunn.

Lesd Sönndag hett de Mannskupp van Trainer **Yasin Turan** un sien Co-Trainer **Arne Janssen** dat twalvte Spöl nananner neet verloren. Se wunnen dat Spitzenspöl in Gifhorn mit 2:1.

Dorhen wassen se up egen Kösten mit 2 Bullis un een Pkw na Gifhorn fahren. All overnachteten in Jögdhotel Wolfenbüttel un harren bi dat wiedere Programm ok völ Spaaß.

De Toren fullen all in de eerst Halvtied, wor de Jungs van Kickers Emden sük so recht in 't Spöl rinhalten. In de 36. Menüte kwamm 'n Freestöt van **Gökay Bathay** van links up **Tilo Janssen**, de mit 'm Koppball dat 1:0 skoot. Blot 6 Menüeten later 'm heel wunnerbaar „Kombination“.

Sebastian Bloem lupfte de Ball over de Ofwehr van Gifhorn. Dor stunn **Tido Steffen**, de Torjager, richtig, un he lupfte de Ball nochmal over de Torwart in 't Nett. Dat was Tido Steffens 15. Tor un he liggt dormit wiet för sien Konkurrenten ut Verden und Langenhagen, de blot elk up 9 Toren komen sünd.

Kört vör de Halvtiedpaus full dann doch noch 'n Tor för Gifhorn.

Na de Pausentee kwamm de Gastgeber up. Man Kickers-Torwart Karsten Buss hull all Ballen, de up sien Tor kwammen.

„He was uns best Mann up de Platz“ see dann ok Trainer Turan na 't Spöl.

Wall liggt de Kickers-Mannskupp achter Langenhagen in de Neddersassenliga up de 2. Platz, man Langenhagen hett een Spöl mehr.

Ik much van disse Stee de Mannskupp graleren un nöhm dorum maal all Spölers, de tegen Gifhorn insett wurden, dat wassen:

Karsten Buss, Gerrit Philipps, Gökay Bathay, Tilo Janßen, Liven Treuke, Marco Borchers, Arne Lautenbach, Ayaovi Bamenzon, Sebastian Bloem, Tido Steffens, Tobias Bruns, Marcel van Stee und Eike Stolz.

Maak wieder so, Jungs, un wenn drup ankommen sullte, dann helpt ok maal in eerste Mannskupp van Kickers Emden in de Oberliga ut. De Mannskupp mutt de Saison toe Enn spölen, dormit dorna in de Landesliga 'n neei Anloop nohmen worden kann.

Wenn Sönndag in Oldenbörg spölt worden kann, dann will ik mi dat Spöl dor ankieken. Ik tipp up 'n 1:1, ofwall de VFB heel düchtig in 't Komen is.

So, tolesd as immer, 'n lüttje Foetballwitz:

Treffen sük Klose un Podolski na 'n lang Tied, seggt Klose: „Minsk, Poldi, di hebb ja ewig neet mehr sehn! Wor wasst du dann de hele Tied?“ Podolski: „Ik hebb drie Jahr an een Puzzle arbeit.“ Klose: „Wat, so lang?“ Poldi: „Dat is doch neet lang! Up de Packung stunn seß bit acht Jahr.“

So leev Toehörers van Radio Oostfriesland,

ik hoop, Joe hett dat Plattdütsk gefallen, denn mien Motto heet ja alltied,

plattdütsk dürt nettso as Kickers Emden – neet unnergahn.
Bit anner Maal
Joe
Erich Bolinius ut Emden-Petjem.